

15 May 2025

समे .18:20 Hrs

<><><><><><>

Headlines

- परमाणु थेआर पाकिस्तान च सुरक्षित नेई हैन, इनेंगी ऐटमी उर्जा सरबन्धी अंतरराष्ट्री एजेंसी AIEA गी अपने इख्तेयार हेठ लई लैना चाइदा।
- सेना प्रमुख होरें बारामुला दे अगेत्रे इलाकें दा दौरा लाया ते आप्रेशन सिंदूर दौरान निभाई गेदी भूमिका दी सराहना कीती।
- सशस्त्र बलें दी दलेरी ते उन्दे शौर्य प्रति सम्मान प्रकट करने ते राश्ट्री एकता जाहिर करने लेई जम्मू च अज्ज तिरंगा जात्तरा कड़ी गेई।
- पुलवामा जिले दे अवन्तीपोरा इलाके च इक टाकरे दौरान त्रै आतंकवादी मारे गेन।
- रियासी जिले दे जंगली इलाके च संदिग्ध नकलो-हरकत दिक्खे जाने मगरा सुरक्षाबलें तपाशी अभियान चलाया।

<><><><><><>

Rajnath-JK

रक्षा मंत्री राजनाथ सिंह होरें आखेआ ऐ जे आप्रेशन सिंदूर पिछले केई दहाकें थवां पाकिस्तान ते पाकिस्तान दे कब्जे आहले जम्मू-कश्मीर च फैलाए जा'रदे आतंकवाद खिलाफ भारत दी सख्त ते कठोर कार्रवाई ऐ। रक्षामंत्री होरें अज्ज श्रीनगर च सेना दी 15 कोर बदामी बाग छोनी च सैनिकें गी संबोधित करदे होई एहू गल्ल आकखी। रक्षा मंत्री होरें आप्रेशन सिंदूर दी सफलता आस्तै भारतीय सेना दे साहस, शौर्य ते कुशलतापूर्वक कार्रवाई दी सराहना कीती। राजनाथ सिंह होर श्रीनगर पुजे ते सैनिकें गी उंदी दलेरी ते मुल्लख दे लोकें आसेआ सम्मान प्रगट कीता। उनें आखेआ।

उनें आखेआ जे पूरी दुनिया नै पाकिस्तान दे गैर जिम्मेदाराना बवहार दिक्खेआ। पाकिस्तान दे हत्थें च परमाणु थेआरबंद दी सुरक्षा पर बी सौआल पुट्टे। उनें आखेआ।

<><><><><><>

Army-chief

सेना प्रमुख जनरल उपेंद्र द्विवेदी होरें बारामुला जिले दे अगेत्रे इलाकें दा दौरा लाया ते आप्रेशन सिंदूर दौरान कब्जा रेखा पर बलें आसेआ निभाई गेदी भूमिका दी सराहना कीती। उनें आखेआ जे बलें गी कुसै बी चुनौती कन्नै निब्बड़ने लेई म्हेशां तयार रौहना। सोशल मीडिया पोस्ट एक्स पर सेना नै जानकारी दिती ऐ जे प्रमुख होरें चिनार कोर दी Dagger Division दा दौरा लाया ते जोआनें कन्नै गल्ल कीती। बलें गी संबोधित करदे होई उनें उन्दे शौर्य बलिदान ते साहस दी सराहना कीती।

<><><><><><>

Tiranga-Yatra

भारतीय फौज दे आप्रेशन सिंदूर दी ऐतिहासिक जित्त नै समूलचे मुलखै गी आत्म सम्मान ते गौ दी भावना कन्नै भरी दित्ते दा ऐ ते हर कोई अपने सैनिकें दी हिम्मत, दलेरी ते राष्ट्र दी रक्षा लेई उंदी समर्पण भावना दा गुणागान करा करदा ऐ। इस्सै कामयाबी गी इक जश्न दे रूपै च मनाने लेई मुख्य भरै च 11एं दिनें दिएं तिरंगा जात्तराएं दा सरिस्ता कीता गेआ ऐ जेदे च शामिल समाज दे बक्ख-बक्ख तबकें दे लोक भारत माता दी जय ते भारतीय थेआरबंद बलें दी जय-जयकार करदे होई चबक्खिय देश प्यार ते राश्ट्रीय इकजुटता दा नजारा पेश करा करदे न। तोआई, श्रीनगर दे लाल चौक च बी तिरंगा जात्तरा कडुी गई जेदे च बड़ी मती गिनतरी च लोकें हत्थें च तिरंगे लेई भारत माता दी जय दे नारे लाए ते भारत दी जित्त दा जश्न मनाया।

<><><><><><>

Prez.SC

सुप्रीम कोर्ट नै राष्ट्रपति ते राज्यें दे राज्यपालें आस्तै कुसै बी बिल पर कार्रवाई करने आस्तै समें सीमा तय कीती ऐ। सुप्रीम कोर्ट दे फैसले मगरा राष्ट्रपति द्रौपदी मुर्मू होरें अदालत थवां सौआल पुच्छे हे। उनें आखेआ जे संविधान च तय समें सीमा दी बवस्था नेई होने पर बी केई विधायकें गी मंजूरी आस्तै राज्यपालें पर कोई समें सीमा तय कीती जाई सकदी ऐ। संविधान दी दफा 143 (1) तैहत राष्ट्रपति होरें गी विधि ते लोक महत्व दे मामलें च सर्वोच्च अदालत दी राय लैने दा अधिकार ऐ। इस बरे अप्रैल महीने सुप्रीम कोर्ट नै कुसै बी बिल पर फैसला लैने लेई समें सीमा तय कीती ही। संविधान दी दफा 201 तैहत राष्ट्रपति हुंदी मंजूरी दी प्रक्रिया तय कीती गई पर ओदे च कुसै बी चाल्ली दी समें सीमा जां खास प्रक्रिया सरंबधी जरूरतें दा जिक्र नेई ऐ।

<><><><><><>

Operation Sindoor Haile

रियासी जिले दे बसनीकें भारती थेआरबंद बलें आसेआ पूरी कामयाबी कन्नै आप्रेशन सिंदूर गी तोढ़ चाढ़ने पर बड़ी मती खुशी जाहिर कीती ऐ। देसै लेई पैदा होए दे खतरें गी तबाह कने दे आम लोकें दी सुरक्षा यकीनी बनाने लेई चलाए गेदे आप्रेशन सिंदूर गी रियासी जिले दे बसनीकें दा बड़ा मता समर्थन हासल होआ ऐ। इनें लोकें सुरक्षाबलें दिएं फौरी, अनुशासित ते असरदार कार्रवाईएं दी सराहना करदे हेई इसी खित्ते च टिकाऊ रमानदारी दी दिशा च पुट्टी गेदी गैंऽ करार दित्ता ऐ। मकामी समुदायिक लीडरें, युवा प्रतिनिधिएं ते परोआरें बी थेआरबंद बलें दी उंदी निष्ठा लेई सराहना कीती ऐ। इस बारै स्हाड़े रियासी संवाददाता कन्नै गल्ल करदे होई किश मकामी बसनीकें आखेआ।

<><><><><><>

Encounter

दक्खनी कश्मीर दे पुलवामा दे नादेर-त्राल इलाके च होए दे टाक्करे च सुरक्षाबलें 3 बेपंछानू आतंकवादिएं गी मारी मकाया ऐ। सुरक्षाबलें दा एहू अभियान अज्ज बड्डुलै शुरू होआ हा। कश्मीर दे आई.जी.पी वी.के बिरदी होरें आकाशवाणी समाचार गी दस्सेआ जे अभियान दरान 3 थेआरबंदआतंकवादिएं गी मारी मकाया गेआ ऐ। मारे गेदे

आतंकवादिएं दी पंछान कीती जा'रदी ऐ। एहदे शा पैहले इलाके च आतंकवादिएं दी मजूदगी बारै इक्क पक्की सूह थोने परैंत फौज, जम्मू-कश्मीर पुलस ते सी.आर.पी.एफ आसेआ नादेर-त्राल इलाके च सांझे तौर पर घेराबंदी ते तपाशी अभियान चलाया गेआ हा।

<><><><><><>

Search-Operation

सुरक्षाबलें रियासी जिले दे इक जांगली इलाके च संदिग्ध नक्लो हरकत दी जानकारी थोने परैंत उत्थे अज्ज तुपाई अभियान चलाया। आकाशवाणी दे जम्मू संवाददाता दी रिपोर्ट मूजब जिले दे भागा (पागा) इलाके च इक महिला आसेआ द'ऊं संदिग्धें गी दिक्खे जाने दे बारै च थोई दी इक सूह पर कार्रवाई करदे होई जांगली इलाके च सुरक्षाबलें आसेआ सांझा तपाशी अभियान चलाया गेआ। इस अभियान च सुरक्षाबलें आसेआ ब्हाई मदाद बी लैत्ती जा'रदी ऐ तां जे इलाके दी सुरक्षा यकीनी बनाई जाई सकै। तोआई, जंदे रोज कठुआ जिले दे घगवाल इलाके च इक महिला आसेआ द'ऊं संदिग्धें गी दिक्खे जाने परैंत सुरक्षाबलें आसेआ रम्भेआ गेदा तपाशी अभियान अज्ज दुए ध्याड़े बी जारी ऐ।

<><><><><><>

Shells-Defused

भारतीय फौजै राजौरी जिले दे नौशहरा इलाके च कब्जा रेखा दे नेड़े कलसियां ग्रांऽ दे रियहायशी इलाकें च पाकिस्तान आसेआ दागे गेदे नेई फटे दे शैल्लें गी नकारा कीता। पिछले दिनें बन्ने पर बनी दी तनोतनी दे दरान पाकिस्तान नै एहू शैल्ल रिहायशी इलाकें च दागे हे जेड़े उसलै फटे नेई ते हून फौज आसेआ मकामी लोकें दी सुरक्षा लेई इ'नें शैल्लें गी नकारा बनाया गेआ ऐ।

<><><><><><>

DGP

जम्मू-कश्मीर पुलस दे डरेक्टर जनरल नलिन प्रभात होरें जम्मू दे आई.जी.पी भीम सेन टूटी हुंदे नै पुंछ दा दौरा लाइयै उत्थे पाकिस्तान आसेआ हाल च कीती गेदी गोलाबारी परैंत बने दे हालात दा जायजा लैता। डीजीपी होरें अपने दौरे दी शुरूआत जिला पुलस लाईन्स पुंछ थमां कीती जित्थे उनें पाकिस्तानी गोलाबारी करी होए दे नुकसान दा जायजा लैत्ता। उ'नें मकामी पुलस अधिकारिएं कन्नै गल्लबात कीती ते इलाके च मजूदा सुरक्षा बंदोबसतें दी बी जांच कीती। मगरा डीजीपी होरें राजा सुखदेव सिंह जिला अस्पताल जाइयै उत्थे गोलाबारी च जख्मीं होए दे लोकें कन्नै मलाटी कीती। उनें जख्मिएं दी डोल पुच्छी ते उनेंगी हर मुमकन मदाद दा भरोसा दोआया। पुलस दे आला अधिकारिएं दा एहू दौरा लोकें दी सुरक्षा यकीनी बनाने दी प्रशासन दी बचनबद्धता गी दर्शादा ऐ।

<><><><><><>

School-Open

पुंछ जिले दे बफलेयाज ते सुरनकोट ब्लाकें च पाकिस्तानी गोलाबारी कारण इक हफ्ते शा मते चिरै तोहड़ी बंद रौळने मगरा स्कूल अज्जै थमां परतियै खुल्ली गेन। पाकिस्तान दी गोलाबारी दरान विद्यार्थियों दी सुरक्षा यकीनी बनाने लेई एहतियाती हीलें दे तौर पर स्कूलें गी बंद कीता गेआ हा। हून हालात ठीक होने मगरा शैक्षणिक गतिविधियां फी शुरू होई गेइयां न। इस सरबंघै च आकाशवाणी समाचार कन्नै गल्ल करदे होई बफलेयाज दिएं साबका सरपंच ताहिरा तबस्सुम होरें गलाया।

<><><><><><>